



Yandi butukaka na kilumbu ya 09 Ngonda ya tatu na mvula 1967 na Mbanza ya Bukavu, na Sud-Kivu, Denise NYAKERU TSHISEKEDI me kwelaka tuka mvula makumi zole na tatu, yandi ikele nkento ya Ntuadisi ya tanu ya République démocratique ya Congo, Mbuta Felix-Antoine Tshisekedi Tshilombo. Yandi ikele na kiese mingi na kuvanda mama ya bana tanu: muana ya bakala mosi ye ya bankento iya.

Yandi kumaka muana ya nsiona na nima ya lufua ya tata ti mama na yandi, kaka ngonda uvua na nima ya lubutuku na yandi, buna yandi ti bampangi na yandi ya babakala ye bampangi na yandi ya bankento kuendaka kuzinga na Kinshasa kisika ya nguasi na yandi, aumônier catholique ya Forces Armées Zairoises, Nganga Nzambi Sylvestre Ngami Mundawa yayi kundimaka na kusansa bau.

Na mvula 1985, nguasi na yandi yayi ya kuvandaka kusadisa bau kutanaka na kigonsa ya lufua na nzila. Na ntuala ya mambu yayi ya mpasi mingi kibeni yandi lembisaka maboko ata fioti ve, kansi yandi kumaka diaka na kikesa mingi ye yandi tulaka kivuvu mingi na kukuenda na ntuala ti luzingu na yandi. Yandi bakaka diplôme d'Etat ye yandi fulaka na kulonguka banzo nkanda na yandi kuna na Belgique, kuna yandi bandaka kosalu na yandi ya Kusansa bambefu.

Yandi salaka kosalu yayi na ntima ya mbote sambu na bantu yonso, na luzitu yonso, na kuwakana na bantu yonso, ye na ntima ya kusadisa bantu yonso na kuwakana mbote ti bantu yonso, yandi me yela na kati ya bikalulu yayi ya mbote, yayi ya kele kutadisa luzingu na yandi ye yau mpi ikele tuadisa mabanza na yandi na kupona mambu yonso na luzingu na yandi na na biyeka yina yonso yandi lunga baka na ntuala.

Tuka ntangu ya bakala na yandi kubakaka kiyeka ya nene ya kutuadisa nsi na beto République démocratique ya Congo, yandi ya bau ikele kubinga tuka ntangu yina « Nkua lukumu Nkento ya ntete », yandi me kudipesa mvimba na kupesa lukumu na nkento ti na muana nkento ya buala congo na kati ya kinvuka na yandi « Fondation Denise Nyakeru Tshisekedi, (FDNT) ».

Kinvuka yayi FDNT, tuka ntangu yau salamaka na ngonda ya tanu na nvula 2019, yo ke tadila mingi mingi ntu ya nene ya bisalu iya sambu na kulungisa mabanza na yandi yayi ya nene ya beto me tubila awa na ntuala. Ya ntete me tadila mavimpi ya nkento, yayi ikele dikunji ya nene na kutuadisa nsi ya mbote. Ya zole me tadila kulonguka nzo nkanda sambu na muana nkento, mingi mingi bayayi ya ikele na binzunga ye na luzingu ya mpasi.

Ya tatu me tadila kunuanisa mambu yonso ya yimbi ya ikele bebisa lukumu ya nkento ye ya muana nkento, sambu na yandi mosi ye sambu na nsi mvimba, yayi yonso ya ikele kusosa kukumisa nkento bonso kima ya kukonda mbalu. Ya nsuka me tadila kupesa nkento ya nsi ya Congo kiyeka ya kusala kosalu ya kuvanda na mbongo, yayi ikele bonso na nsuka ya ndonga ya mambu yonso, sambu kaka nkento yina ikele na mavimpi ya mbote, yayi ya me longuka nzonkanda ye ya ikele na ngemba, yandi yina lunga pesa diboko sambu na kutunga buala.

Yandi ponamaka na kubaka kiyeka ya kuvanda ntumua ya luzolo ya mbote na kati ya kinvuka yayi ya me tadila mambote ya bantu yayi ya bo ikele binga Fond Mondial pour la Population na munkufi (UNFPA) tuka ngonda ya tanu ya nvula 2019, sambu na kunuana na kumanisa mambu yonso yayi ya mubulu ya kesalamaka na bankento ye sambu na kupesa kiyeka na bankento, Bureau ya Representant Special ya Secretaire General ya Nations Unies yayi ya ikele tadilaka mambu ya kukanga nzila na mubulu ya kesalamaka na bankento, me pesaka yandi mpi kiyeka ya kuvanda « nkento ya ntete na ntonto nvimba ya ikele kukanga nzila na mubulu yonso ya kesalamaka na kubaka nkento na kingolongolo ntangu nguakana ikele konda na kati ya bantu » tuka ngonda ya decembre (ngonda ya kumi na zole) ya na nvula ya 2019. Kiyeka yayi ikele lufutu ve ata fioti, kasi yau ikele kiyeka ya nene

na zulu ya ntu na yandi sambu na kuvanda : mutubidi ya bayayi ikele konda ndinga ya kutuba na kati ya binvuka yayi ya ikele tadilaka mambu yayi na kati ya bansi na bau, na binzunga ya ndambu ntoto to na nsi ya nvimba na kati ya ba Nations Unies.